

續集古今佛道論衡

唐

沙門

智昇

撰

撰



清刻龍藏佛說法變相圖

續集古今佛道論衡

西域天竺國事出後漢列傳七十八

曲九

唐沙門智昇撰

案漢法本內傳云明帝永平年中夜夢見丈六金人光明特異色相無比明帝寤不自安至旦大集羣臣以占所夢通人傅毅奉答曰

曲九

臣聞西域有神號之爲佛陛下所夢將必是之國子博士王遵謹對曰臣案周書異記云周昭王時有聖人出在西方太史蘇由對曰所記一千年外聲教被及此土陛下所夢必當是之明帝信以爲然即遣中郎蔡愔與中郎將秦景博士王遵等十八人尋訪佛法至天竺國遇見沙門迦葉摩騰竺法蘭二人秦景等乃求請之摩騰二人誓志弘通不辭疲苦即共景等乃冒涉流沙至於洛陽明帝大悅甚尊重之即於洛陽西立精舍即今白馬

寺是也本白馬負經來因以爲名摩騰二人既至翻譯衆經二人爲漢地僧之始經是漢地法之初又釋迦像是優填王像師第四作之明帝即令圖畫模寫如法供養即是漢地三寶之初

永平十二年十二月十一日明帝在白馬寺設齋行道帝問法師摩騰曰佛處生化世滅度日月可知不法師對曰佛癸丑之年七月十五日夜託陰摩耶夫人甲寅之年四月八日在迦毘羅衛國藍毘尼園從母右脇而生案周書異記云周昭王即位二十四年甲寅歲四月八日江河泉池忽然汎漲井水並皆溢出宮殿人舍山川大地咸悉震動其夜五色光氣入貫太微遍於四方盡作青紅色周昭王問太史蘇由曰是何祥也蘇由對曰有

聖人生在西方故現此瑞昭王曰於天下何如蘇由曰即時無他一千年外聲教被及此土昭王即遣鐫石記之埋在南郊天祠前當此之時佛生王宮壬申之年十九出家

漢統師云佛十九出家當周昭王四十二年

佛九

壬申之歲三十成道漢統師云佛三十成道周穆王二年癸未之歲當陽化世四十九年漢統師云佛出世化物四十九歲案周書異記云周穆王即位三十二年見西方所有光氣先問蘇由所記知西方有聖人處化穆王不達其理恐非周道所宜令相國呂侯西入會諸侯於塗山以禳光變當此之時佛法久已處世壬申之年二月十五日臨般涅槃漢統師云佛入涅槃當周穆王五十二年壬申之歲案周書異記云周穆王即位五十二年

壬申歲二月十五日平旦暴風忽起廢損人舍傷折樹木山川大地皆悉震動午後天陰雲黑西方有白虹作十二道南北通過連夜不滅穆王問太史扈多曰是何徵也扈多對曰西方有聖人滅度衰相現也穆王大悅曰朕常懼於彼今將滅度朕何憂也當此之時佛入涅槃計佛入涅槃至今合有一千二十二年明帝大悅曰弟子此土周書異記法師所說恰然與同帝復問法師曰佛是大慈法王當時出世何不化及此土法師對曰迦毘羅衛國者是三千大千世界百億日月之中三世諸佛皆從彼生乃至天龍鬼神有願行力者並生於彼受佛正法咸得悟道餘處眾生無緣感佛佛不往也當時佛不往處光明皆悉及之光明及者佛涅槃後或五百年或

一千年之外皆有聖人傳佛聲教而教化之明帝曰法師言一千年外有聲教者亦與周書異記同案齊國大統法師達摩鬱多羅答高黎國諸法師云佛當周昭王二十四年四月八日生當周孝王五年二月十五日入般涅槃案帝王世紀云周昭王即位五十一年崩周穆王即位五十五年崩周恭王即位十二年崩懿王二十五年崩從昭王二十四年計至孝王五年合一百二十四年從佛初生計入涅槃合七十九年今言孝王五年者何太謬乎未知統師出何書典

案世傳記云正法五百年像法一千年末法一萬年經云息用名滅非死滅也一本無像法有正末二法記從佛入涅槃計漢明帝永平十年凡一千二十年從漢明帝永平十年

計至大業十年甲戌歲凡五百四十八年合
一千五百六十八年從大業十年至貞觀十
年歲次丙申二十二年通前一千五百九十
年

漢法本內傳第三

道士度脫品

曲九

明帝永平十四年正月一日五嶽諸山觀道
士朝正之次先永京師向西域天竺國取得
佛本言是修多羅教復請梵師迦葉摩騰竺
法蘭二人等翻譯佛本一從漢言又立白馬
興聖二寺勅度公子女令作沙門承事梵師
遵用其法京師貴賤奉敬者衆諸道士怪焉
遞互相命曰至尊棄我道法遠求梵教我等
今日朝次各將太上天尊所制經書各盡已
之所能共上一表乞與梵師比校令至尊意

悟使有所歸爾時南嶽道士褚善信等七十
人將靈寶真文一部太上靈寶玉訣一部空
洞靈章一部中玄步虛章一部太上左仙公
請問一部自然五稱一部諸天內音一部合
一百三卷

華嶽道士劉正念等七十人將智慧定志一
部智慧上品戒一部仙人請問本行因緣一
部明真科一部合六十二卷

恒嶽道士桓文度等七十人將本業上品一
部法科罪福一部明真科齋儀一部太上說
洞玄真文一部合八十卷

岱嶽道士焦德心等七十人將諸天靈書度
命一部太上說太極太虛自然一部滅度五
練生屍一部度自然處儀一部合八十五卷
嵩嶽道士呂惠通等一百四十人將太上安

曲九

五

志上品一部三元誠品一部太極左仙公神仙本起內傳一部服御五芝立成一部朝夕朝儀一部合九十五卷

霍山天目山五臺山白鹿山官山合八山諸山觀道士祁文信等二百七十人將太極真人數靈寶文一部太上洞玄靈寶天文五符經一部步虛文一部神仙藥法一部尸解品一部上天符錄勅禁一部合八十四卷并茅成子一部許成子一部列子一部惠子一部合二十七家諸子經書總二百四十五卷

正月九日揚州界豫章郡吳丘縣南嶽道士褚善信以爲表頭五嶽十八山觀太上三洞弟子道士褚善信等六百九十人死罪上言臣聞太上無形無名無極無上虛無自然大道元首自從造化道教從生無上無爲之尊

自然之父上古同遵百王不易今陛下道邁義皇德過堯舜光澤四海八表歸仁臣等竊承陛下棄本追末求教西域臣觀西域所事者既是梵師所說者不參華夏復請得梵道人令翻其語託同似漢臣等思忖陛下雖翻得此語恐非大道如不依信願陛下恕臣等罪聽與驗試臣等五嶽諸山道士多有聰明智慧博通經典從元皇已來太上經術悉能曉了太虛符呪並皆明達或有吞符餌氣或有策使鬼神或有入火不燒或有履水不溺或有白日昇天或有隱形於地至於方藥法術無有不能者願陛下許臣等得與比校一則聖上意安二則得辨真僞三則大道有歸四則不亂華俗臣若比對不如任上重決若臣等比對有勝乞除虛詐臣等誠惶誠恐死

罪死罪以聞明帝又得沙門迦葉摩騰竺法蘭等二人說法善明法相心大信敬既得道士表聞即遣尚書令宋庠引諸道士至長樂宮前帝謂道士曰諸大德莫自誤也大德所言太上無形無上爲尊自然之父者今日西域所將來是修多羅之教其教難遇今始東傳大德比來所學者影響耳非其真法大德今既見真法仍不捨本從未何異古人葉公之龍也褚信奉問曰若佛道是真應無形色云何圖畫其像以此驗之定非虛無自然之宗帝曰摩騰法師曾爲朕說法言佛有四種法身所謂法報應化一者法身無爲無相無主無宗蕩寂空無自然憺怕二者報身獨立無侶朗然無匹光耀世界自在隱顯三者應身備諸形色言行無端任物千圖神應萬變

九

六

四者化身開演正法導以三乘利潤蒼生隨機化悟諸大德須知佛有四種法身出沒自在不可思議其用也則萬像俱應其息也則託入幽玄此是智慧之大山涅槃之巨海必須敬信得福無量褚信問曰不審帝說涅槃是何句義帝曰涅槃無爲憺怕自然此四者一味耳如似眼目異名焉褚信問曰涅槃之義有幾種帝曰摩騰法師曾與朕說法云涅槃義乃有多種言入聖位中者涅槃有五種一者隨分涅槃二者有餘涅槃三者覺滅涅槃四者方便涅槃五者究竟涅槃褚信問曰未審五者其義云何帝曰一者小乘初果須陀洹果斯陀舍果阿那舍果各受人天報盡得生初禪或生二禪或生三禪是名隨分涅槃二者小乘極果阿羅漢善蔽六根證七識

曲九

七

空智得生四禪或生空處是名有餘涅槃三者中乘辟支佛果觀十二因緣證滅盡樂得生識處乃至非想非非想處是名覺滅涅槃四者大乘初地已上菩薩常居六道出入生死不捨衆生隨類受形而教化之清淨願行不退菩提是名方便涅槃五者菩薩於無量劫世常在生死海中歷諸勤苦修行善本成就萬行得證無上真正正道是名究竟涅槃褚信奉答曰若佛是究竟涅槃願聽與試帝曰卿若爲比試褚信對曰臣以太上天尊所說經典設壇置經壇上以火焚之其法若真願火不燒其法若虛妄願從火化西域之教願與臣同於此試帝曰卿無自辱焉朕恐卿等螢火之光明濫同日月之顯彈丸之土竊價隋國之珠寶非其類如欲相比卿既不相

信可此月十五日平旦總集白馬寺與卿比校道士既得勅許歡忻而去諸道士在京師聚衆或在洛水上履水而行水不能溺或在園苑積薪自燒火不能損或在京師市巷作種種咒禁呼策鬼神京師觀者咸言大聖正月十一日帝詣白馬寺至佛殿前燒香行道禮拜訖問二法師稽首具說諸山道士功能欲來與師比校弟子輒不自量口以許之尅此月十五日大集白馬寺願師垂恩開示法藥摩騰法師對曰如來滅度一千餘年正教東流法不虛設道士欲來比校今正是時貧道雖處縉服戒行無取今仰憑正法諸佛威力得與開悟帝聞此言心大歡喜摩騰法師復語曰陛下往修福業得爲天下主既遇正法復能信心奉敬方欲引導群生指於歸處

此是開基之功恩加萬葉菩薩之行功德難
量帝即整容禮摩騰法師足啓法師曰弟子
往蒙法師光相喜滿交懷又屈法師持法宣
化弟子一生再幸不勝慈澤法師大悅今帝
復坐問竺法蘭法師曰西域有道士以不法
師對曰西域梵志者同此間道士帝曰道有
幾種以何爲宗法師對曰道有九十五種並
宗正法其行有差欲可觀者八種梵行一者
常修梵行博通外典事摩醯首羅天王以爲
天尊求生空處識處非想非非想處二者常
修梵行博通外典事大梵天王以爲天尊求
生初禪二禪三禪四禪三者常修梵行博通
外典以爲天尊求生欲摩天兜率天化樂天
他化自在天四者常修梵行博通外典辯於
論答事六師弟子等以爲師尊求憑空滅絕

有離無五者常修梵行志在仙學善禁呪事
阿私陀仙以爲仙尊求五神丹服之若得仙
道會假風鳥力得昇霄漢六者常修梵行志
在醫學善於符術事阿私陀仙以爲仙尊求
五芝草服之若得仙道會假商劣得匿形影
七者常修梵行事波頭大仙以爲仙尊求入
火聚火不能損八者常修梵行事夷制叔羅
水仙以爲仙尊求入江海水不能溺此八種
道以梵行力得生天上以不發正信迴向心
故天上壽盡還墮三惡道中帝曰此八種道
常修梵行博通外典即是世間聰慧上人當
時值佛應得悟正法云何不捨諸見仍有此
執法蘭法師對曰佛生難遇百一小劫一佛
出世佛未出已前造化之始或有大力諸天
或有自在聖人恐世無訓降生此俗或作帝

王或作師儒各舉已 或教梵行或可教禮
敬行或教事佛或教事日月神或教事江海
神或教事諸山神或教事水火神或教事社
稷神或教事先師神如是等種種神明悉教
事之衆生從劫初已來學習久遠雖值佛出
世有鈍根者咸言我之所事從元皇已來世
世尊仰佛雖神異其教近耳何能捨本從今
爾時執見者在其道不滅帝曰佛道之中亦
有仙號尔不法師對曰仙者並傳梵行多諸
技術是以爲世所尚佛初成道時坐於菩提
樹下世人未識是佛光明顯照咸言摩訶大
仙生未曾有也舍利弗目連等坐卧空中神
化自在各相謂言此是大仙弟子天仙也佛
以隨機應顯仙號生焉帝曰弟子蒙法師說
法心想朗然未審法師預設何法欲調伏道

士法師對曰龍吟雲起非蚯蚓之所能虎嘯
風生非跛驢之所及雷門無施布鼓電曜豈
懼螢光敵對即施何用預搔待痒帝乃大笑
弟子知師有證達之理無畏懼焉法師對曰
貧道未得過人法又不敢增上慢譬如帝子
爵位封王帝令即命將勅巡省革易風俗其
王見州郡縣官人豈有不懼以不帝曰使者
既是朕子又行朕命至於州郡縣豈敢不懼
法師又問曰王巡省之次郡縣令長敢在王
前行自在以不帝曰承朕威命所在官人懲
肅畏法寧敢自在法師曰如是如是誠如帝
說貧道出家人亦名法王子所持正法亦是
法王金口所說所在教化亦無畏懼若法行
處一切諸天魔鬼莫不奉敬道士小慧何足
消伏帝聞法師一言轉加意大即辭法師入

城勅有司令辦供設齋并勅五品已上文武
內外官人仰十五日平旦悉集白馬寺十三
日道士在白馬寺南門外道東裏東西置三
壇壇別開二十四門西壇置太上靈寶天尊
經合三百六十九卷中壇置諸子黃老等二
十七家書合有二百四十五卷東壇置饌食
奠祀百靈十四日帝設七寶行殿在白馬寺
南門道西百步置佛舍利及佛經像十五日
平旦大衆普集已時齋訖帝謂道士曰諸大
德欲試今正是時先顯卿等所能以示大衆
道士等奉勅即以柴荻和梅檀沉水等香木
積遶西壇經教上復作啓告帝啼哭流涕曰太
上天尊經典與造化俱開往哲今賢遵行不
捨今爲西域別教入亂華俗臣等五嶽諸山
觀褚善信等合有六百九十人敢以置經壇

上以火取驗欲用曉示衆生以辯真僞伏願
上慈顯出神効即便放火燒經經隨火化悉
作灰燼道士等見火焚經心大驚愕先時昇
天者不復能昇先時隱形者不復能隱先時
入火者不敢更大先善禁呪者呼策不應先
有種種功能者施用無一可驗道士等大生
慙愧帝謂道士曰卿等不聞益州部內有鍾
山亡命賊在於山澤放縱自由謂無過者及
其臺軍討罰形勢不立卿等今者亦復如是
爾時太傅張衍語褚信曰卿今角試無一効
驗即是虛妄宜就西域真法褚信對曰茅成
子云太上者靈寶天尊是也造化之始謂之
太素豈妄乎張衍曰太素有貴德之名更無
言教之稱今說有言教者即是虛妄也吾究
尋典籍靈寶迴無氏族可依推尋古今靈寶

幽九

十二

亦無成道處所若靈寶自然者經典從何而生若說靈寶出世者古帝前王與誰說法虛受太上之名妄假天尊之號此是仙學法王說也濟於六道普潤含靈卿亦可歸真棄妄必須尊學若不恭敬可謂虛度百年無功而逝卿若慢心不信亦可專心黃老黃老雖無法王之量亦是前世聖人撰集雖同諸子言行甚奧託性無爲道德之府也昔孝景皇帝常修行不倦道學從此生焉處百家之長得擬佛法爲次至於茅子成子列子莊子等書並學自然逍遙塵外亦是黃老之次卿可慕焉何獨專於靈寶也諸信對曰靈寶有昇天隱地之功符禁鬼神之力履於水火無有不効今者以火焚經不蒙哀愍吾大生恥辱衍曰大之制小使其然也譬如州郡令長各處

一境判決自由若對帝王威德不立卿等比校亦復如是今日卿等所學法者欲使山無猛獸之文世絕謬學之侶一則就真辯僞二則不誤將來諸信默然不答與南嶽道士費叔才自感而死爾時佛舍利光明五色出直上空中旋環如蓋徧覆大眾映蔽日輪摩騰法師先得阿羅漢果以慈善根力踊身高飛行於虛空中神化自在還坐本處怡然而住其時天雨寶華在於佛殿前及衆僧上又聞天中音樂之聲感動人情大眾歡喜歎未曾有也爾時法師即於大眾中而說偈言

狐非師子類 燈非日月明 池無巨海納
丘無嵩嶽嶸 法雲垂世界 善種得開萌
顯通希有法 處處化羣生

法師說偈訖白道士曰諸大德欲有所問者

前出共論爾時嵩嶽道士呂惠通對曰吾等
諸人不量德力輒欲比校向見神光顯照絕
世難知又逢大士神變奇特無比天樂垂音
以開我等迷路天華表瑞始知大道有歸我
等未解聖法焉敢諮問明帝即從座起禮法
師足白法師曰弟子常處生死淪沒愛河今
值正教東傳之初願法師大慈開蹤曉示法
師受請默然而許帝勅大衆欲求法者前近
法師座大衆圍遶數百餘重各各靜然爾時
法師即出大梵音聲微妙第一歎佛功德不
可思議亦令大衆稱揚三寶歎述善法即爲
大衆說人天地獄因緣法或說小乘阿毘曇
法或說大乘摩訶衍法或說懺悔滅罪法或
說出家功德法大衆既聞法已各生希有心
爾時司空楊城侯劉善峻白法師曰大德向

者仰觀智慧與海同量非我凡流所能度也
我等欲憑大士出家充奉給侍願垂聽許不
法師曰諸大衆發心出家是解脫業緣仁者
各有王難所繫非我所許帝即前出白法師
弟子比來常爲真假相亂無慧能辯得蒙法
鏡垂照始知實相有歸今此會中有道士官
人民庶及婦女等若能出家者弟子自與剃
頭三衣瓶鉢並悉施與別立精舍奉之使學
道法法師歎曰善哉善哉帝之功德不可思
議爾時大衆聞帝聽許皆大歡喜四嶽諸山
觀道士呂惠通等六百二十人出家南嶽觀
道士褚善信費叔才在會身死南嶽觀道士
六十八人殯埋信等不預說法不得出家五
品已上楊城侯劉善峻等九十三人出家時
帝侍衛九品已上鎮遠將軍姜苟兒等一百

七十五人出家京都治民及婦女阿潘等一百二十一人出家十六日帝共大臣并文武官數百人與出家者剃頭日日設供夜夜然燈作種種技樂比至正月三十日法服瓶鉢悉皆施訖即立十寺城外七寺城内三寺七

寺安僧三寺安尼漢之佛法從此興焉

漢法本內傳凡有五卷

第一卷明帝求法品

第二卷請法師立寺品

第三卷與諸道士比校度脫品

四九

十三

第四卷明帝大臣等稱揚品

第五卷廣通流布品

傳法記一卷

案玄通記云漢桓帝建和三年己丑之歲有沙門安清是安息國王太子捨國出家存意

遊化至洛陽譯出衆經漢靈帝嘉平五年丙辰之歲有一沙門支樓迦識出家是月支國人至洛陽譯出衆經漢靈帝光和二年己未之歲有沙門竺佛朔是月支國丞相棄相位願弘佛道開化衆生至洛陽譯出衆經

案魏書文帝黃初三年壬寅之歲有沙門曇摩迦羅中天竺國人至許都譯出經戒律漢明帝永平十年至魏文帝黃初三年合一百五十年

案吳書吳主孫權赤烏四年辛酉之歲有沙門康僧會是康居國人大丞相之長子志弘大道遊化諸國初達吳地營立茅茨設像行道吳人初見謂是妖異有司奏聞吳主曰漢明帝夢神號名爲佛是其遺風乎即召僧會問之曰佛有何神驗也僧會對曰佛晦靈迹

出餘千載唯有舍利至心求者應現無方吳主曰若得舍利當爲起塔如其虛妄國有常刑僧會對曰舍利慈愍求即顯降若無感者當以死期何假王憲乃請至七日至三七日遂獲舍利五色光曜於天吳主即置舍利鐵十六礎上今大力者以鐵鎚擊而試之當即礎鎚俱陷於地舍利無損吳主復置舍利剛炭火中舍利光明從火而出作大蓮華照曜官殿吳主敬信僧會一遵其法即造建初寺爲舍利起七寶塔其地名佛陀里江東佛法自是興焉起黃初三年至吳赤烏四年凡二十年從永平十年至吳赤烏四年合一百七十年康會是吳地僧之始教是吳地法之初吳主孫權問尚書令都鄉侯闕澤曰漢明帝夢神遺中郎蔡愔等向西域尋訪佛教至今可有

幾年闕澤對曰從漢永平十年至赤烏四年合一百七十年吳主曰佛教入漢已久何緣今始傳至江東闕澤對曰漢明帝永平十四年南嶽道士褚善信朝正之次與諸山觀道士褚信同上一表乞與西域法師迦葉摩騰竺法蘭等比校爾時佛教初到洛陽漢明帝始立白馬寺與聖寺法師迦葉摩騰竺法蘭翻譯衆經始從漢讀道士未達正法深淺不知上表乞與對驗明帝許之至正月十五日在白馬寺門南嶽諸道士設壇將所學法名靈寶經置壇上放火焚之當時以正法力故道士書典悉從火化無有遺者復作種種技術施用無効諸道士等皆大慙恥南嶽褚善信費叔才等在會中自感而死自餘道士明帝勅放還嶽其時不預蘭法師說法者不得

出家爾時無人流布後遭漢政凌遲兵戎不息是以佛法一百七十年中滯而不通今遇法師僧會入來教化江東始得興行吳主曰孔丘老子二家得與佛道比對以不闕澤對曰臣建安年中在洛陽遊學曾入法舉寺禮拜得遇法師惠鏡垂照講大乘經臣聞法愛樂當時遂憑法師在寺得聽法旨首尾向三年臣審知佛是無上法王衆聖所歸教加一切哀含萬像深同巨海不簡細流明竝日月不嫌星燭會觸即化遇物斯乘天上人中自然尊大縱使天有普覆之功地有能載之力皆是諸佛建立使之然臣又尋魯孔丘者英才誕秀聖德不羣世號素王制作經典訓獎周世教加來葉師儒之風澤潤今古亦有逸民如許成子廣成子原陽子列子老子莊子

等百家諸子書皆修身自翫放暢山谷縱汰其心學歸憺怕事乖人倫長幼之節亦非安世化民之風是以古人將爲滯陷蓋此之謂至漢景帝考諸百家以黃子老子義體尤深內外明遠改子爲經始立道學勅訓朝野今諷誦焉若將老孔二家比方佛法遠則遠矣所以然者孔老設教法天制用不敢違天諸佛設教天法奉行不敢違佛以此言之實非比對明矣吳主曰仙有靈寶之法何如闕澤對曰靈寶者一無氏族可憑二無成道處所教出山谷無所知也直是幽居濫說非聖人所制吳主答之曰公學博精通覽無不悉宜加太子太傅領侍中尚書令如故案後涼書秦主苻堅建元十九年遣征西將軍醴泉公呂光西討龜茲國得沙門鳩摩羅

什是龜茲國大丞相之長子呂光至涼州聞秦主姚萇所害光遂稱帝於涼治姑臧羅什在涼州譯出大華嚴經以自翫適至秦主姚興弘始三年至長安譯出衆經佛法爾時大盛當晉大興三年

案北涼州沮渠蒙遜永和二年有沙門曇摩

沙九

十八

識是天竺國人至涼州譯出衆經至持地六

度不譯戒品謂漢地人不能持戒隱而不譯時有比丘披讀經文怪無其戒品遂即行道心專求夜夢見一道人授戒本與比丘得戒誦持至明告識曰昨夜夢中見有法師授我戒品恐有所忘願與正之識即令比丘誦之與本無異識曰善哉善哉大德吾恐漢地人不能持戒不復譯之今大德求而得者漢地必有持者戒品從此流行當晉隆安四年自

此已後年年西國沙門傳法來者衆非記可盡

論營記元魏正光元年歲次庚子七月明帝加元服大赦二十三日請僧尼道士在佛殿前設齋齊訖帝語侍中劉騰宣勅請法師等

曲九

十九

與道士論議以釋弟子疑網爾時諸觀道士姜斌與融覺寺法師曇謨最對論帝問曰佛與老子同時以不姜斌對曰老子西入化胡以佛充侍者明是同時法師問曰何以知之姜斌對曰案老子開天經是以得知法師問曰老子當周何王幾年始生周何王幾年西入姜斌曰當周定王即位三年乙卯之歲在於楚國陳郡苦縣厲鄉曲仁里九月十四日夜子時生周簡王即位四年丁丑之歲事周爲守藏史當周簡王即位十三年丙戌之歲

遷爲太史當周敬王即位元年庚辰之歲年八十五見周德凌遲遂與散關令尹喜西入化胡此足明矣法師對曰佛當周昭王二十四年歲次甲寅四月八日生當周昭王四十二年歲次壬申十九出家當周穆王二年歲次癸未三十成道當陽化世四十九載當周穆王五十二年歲次壬申二月十五日入般涅槃今計佛入涅槃後經三百四十五年至周定王三年老子始生生已年八十五至周敬王元年經四百二十五年始與尹喜西道此則年代懸殊不同鄙夫一何闇說輒言佛爲侍者豈不高拒爲答此乃謬乎姜斌曰案開天之文李柱史西入化胡佛爲侍者亦應不謬法師輒拒此事恐理未安法師對曰夫佛者法王也故能降靈境率生出王宮萬福

四九

二十

圓備億善臻集普化三千均濟六道行即金華捧足坐即百寶蓮臺出則帝釋前驅入則梵王侍後左輔密跡以斷邪僞爲効右弼金剛以滅邪魔爲功無央菩薩以充法子無量聲聞以爲聖衆護世四王朝省天龍八部曉夜奉接天樂懸空如雲天華散落如雨師子一吼外道歸真法鼓自鳴邪魔從正何得與周藏史以爲侍者若周柱下史有法王子之量應在周世如現神通行有避世西逃方能化物若也柱史能化其時周德雖曰衰微仍承文武成康之風柱史旣乃周世五王何不加之以神變顯之以法藥授之若能此者如風在草危正自由何用潛逃於西遠化戎俗況法王柱史相去四百二十餘年今言作周時爲侍者此亦誤之太甚深可興悼焉仁者

既有開天之說此狂簡斐然文章何足依信
姜斌曰若生當昭王滅當周穆王時出何文
記法師對曰出周書異記并出漢書法本內
傳並有明文當今君子故應覽見不能爲君
一人對衆更說姜斌曰孔子既是制法聖人
當時於佛何得迴無一言記法師對曰直是
仁者識同管闚覽不弘廣何得輒謗孔子於
佛迴無一言記仁者若不相信孔子自有三
備卜經佛之出世在中備仁者善自披究足
得開曉姜斌曰孔子聖人不言而識何假卜
乎法師曰唯佛是聖人諸法中王四生良導
遠視一切衆生前後二際吉凶終始不假卜
觀視如掌中自餘聖人雖曉未然之理必藉
筮龜以通靈卦也爾時明帝即遣中書侍郎
魏收又宣勅道士姜斌論無宗旨復云開天

經言老子說者問姜斌此開天經何處得來
是誰持與姜斌對曰臣亡師道士張祥邊得
帝曰經在何處姜斌對曰在觀遣中書侍郎
魏收尚書祖瑩等就觀取經得經將來帝遣
文武官尚書郎已上議當太尉公蕭琮太傅
李寔衛尉卿許百桃吏部尚書邢巒散騎常
侍溫子昇等一百七人讀訖奏云老子止著
五千文西隱流沙更無言說此書虛妄專言
老子化胡說十二部經臣等所議姜斌罪當
惑衆帝謂道士曰卿等比來專學此法何名
求道諸道士對曰臣等並無此書今日始聞
姜斌所說帝即遣中書侍郎邢子才黃門侍
郎楊寬等向觀重搜諸房搜訖盡無此書帝
曰姜斌一人罪合極刑付獄斬決爾時廷尉
卿元超領斌將出三藏法師菩提流支諫曰

陛下新赦恩宥天下今復建齋以啓多福勅
令論議開暢風猷姜斌雖可語無宗旨得沾
案會今陛下縱天怒之威就案法之中如欲
戮人恐不當天意帝曰弟子謹案經云佛在
因中作國王時殺五百婆羅門不犯戒律今
姜斌開天之說此即妖書惑亂朝廷今不斬
決誤後不少法師極諫姜斌免死配徒馬邑

續集古今佛道論衡

謝九

至